

33
DISSERTATIO INAUGURALIS MEDICA
DE

SITV

ERECTO IN
MORBIS PERICVLOSIS
VALDE NOXIO,

QVAM

ANNVENTE DIVINI NVMINIS GRATIA
AVCTORITATE GRATIOSÆ FACVLTATIS MEDICÆ
IN ILLVSTRI ACADEMIA FRIDERICIANA
D. XVIII. MAI. MDCCXXII.

HORIS ANTE ET POMERIDIANIS CONSVETIS
PRO GRADV DOCTORIS
OBTINENDO

PVELICO ERVDITORVM EXAMINI SISTIT
M. GEORG. CHRISTOPH. FEVERLINVS
NORIBERGENS.

HALÆ MAGDEBVRGICÆ
Typis IOH. CHRIST. HILLIGERI, Acad. Typ.

ORDER TO PAY TO THE ORDER OF

217

RECEIVED

MORRIS PERCY

VALDE NOXIO

THE FIRST NATIONAL BANK

OF NEW YORK

IN THE CITY OF NEW YORK

FOR DEPOSIT

TO THE ORDER OF

PROGADY DOCTORS

NEW YORK

THE FIRST NATIONAL BANK

IN THE CITY OF NEW YORK

FOR DEPOSIT

TO THE ORDER OF

THE FIRST NATIONAL BANK



DISSERTATIO INAUGURALIS
DE
SITU CORPORIS ERECTO IN
MORBIS PERICULOSIS VALDE
NOXIO.

PROOEMIUM.



Idendum esse ægrum a Medico, si hic curam illius agere rite ac debite velit, notissimum est diæterium, illis præcipue Practicis familiare, qui nolunt ex sola urinae inspectione fallaces frustraneasque de ægrotantium, morborumque statu divinationes, uroscoporum more, instituire, atque vel se ipsos, vel ægrotantes variis ac fraudulentis technis decipere. Nec facile quis dubitaverit de asserti hujus veritate, cum utique doceat sanatio, longe certius meliusque Medicum ferre posse judicium de ægro ejusque affectu, si ante oculos eum habeat, atque, quænam hætenus fuerit

morbi conditio , causaque antecedens , vel proxima vel remota & occasionalis, per varias quaestiones ex ipso percontetur, ipsisque percipiat sensibus aegri constitutionem rationemque virium, partim ex pulsu, partim ex reliquis corporis actionibus de iis conjiciendo : quam si fundamento innitens plane fallaci, de aegro , quem nunquam vidit, de morbo , quem nondum agnovit, & de cujus incremento, statu aut decremento nullum adhuc sibi conceptum formavit, suam pronunciare velit sententiam, ipsique medicinam adornare. Quemadmodum vero haec ipsa aegrorum a Medico instituenta visitatio summam habet omnino utilitatem: ita certe adhuc longe plus emolumenti inde in aegrotos redundat, si debitam deligenti visitationi jungat quoque attentionem Medicus , probe respiciens ad omnes ac singulas circumstantias, quae & morbum ejusque symptomata , & aegrotum ejusque regimen prudens ac circumspectum concernunt, ut ex aqua & justa illarum aestimatione noxas evitare, praecavere imminetia pericula, commoda autem pro viribus studeat promovere. Dici enim vix potest, quantus sit earum rerum numerus, quae attentum Practicum lectulis aegrorum adstantem monere possunt de una alterave observanda cautela, atque vel apud omnes aegrotantes in genere, vel apud singula aliquando individua applicanda; de quibus vix unquam cogitaverit, nisi praesens earum observasset praesentiam. Quid enim v. gr. frequentius est, quam quod febricitantes saepe numero per totum paroxysmum vomitibus continuis affligantur , praecordiorum torqueantur anxietatibus, multaque alia ad febrem haud pertinentia symptomata experiantur, quorum rationem allegare nequeunt aegri

gri vel adstantes, & quæ ordinariis nullo modo cedunt remediis. Sed facile deprehendit Medicus peritus symptomatum illorum nexum, quando sub paroxysmo ægrum visitans, eum attendit potum capientem, atque videt, vel potum nimis frigidum, vel magnis haustibus copiose & avide ingurgitatum in culpa esse, aut situm atque decubitus cum dorso vel pedibus parieti conclavis frigida nimis propinquum veram esse Symptomatum horum causam. Quibus perspectis facillimum erit, dicta symptomata removeere aut sub reliquis paroxysmis antevertere, si modo potum frigidum, largosque ac avidos denegaverit haustus, aut per lecti a pariete remotionem ægro prospexerit. Non desunt innumera hujus rei testimonia ac exempla, quorum vero plura hic recensere præsens negotium haud permittit. Etenim e reliquis id unicum tantummodo speciminis Inauguralis loco pertractare constitui, quod ab Jll. DN. D. Hoffmanno, Patrono atque Præceptore meo omni honoris ac obsequii cultu ætatem a me prosequendo, frequentissime in praxi observatum, mihi que benevole communicatum est, situm nempe ægrorum erectum, in acutis, aliisque quibusdam gravioribus morbis inque eorum statu præcipue ac vigore noxium admodum esse, atque periculosum. De quo cum hætenus, quantum scio, nemo Medicorum quicquam ex professo tractaverit, in observationis hujus rationem inquirere animus est, simulque ostendere, quam necessarium sit, ut hujus quoque circumstantiæ ratione circumspectos cautosque se gerant Medici, dumque ad ægrum visunt, probe eam attendant, quo tempestivo consilio damna hinc oriunda removendo ac præoccu-

pando salutis ægrorum possint consulere. Cui instituto meo ut supremum Numen ex alto benedicat, ex animo precor.

§. I.

CUM de testimoniis & observationibus Medicorum hac dere colligendis sollicitus sim, vix ac ne vix quidem deprehendere mihi liceat paucissimis verbis annotatam sitis erecti in morbis periculosis noxam. Videtur tamen eam jam attendisse Divum Senem Hippocratem, qui, sicut in colligendis & consignandis aliis ad veritates medico-practicæ spectantibus circumstantiis diligentissimus fuit & accuratissimus, maximamque reliquit copiam rerum fusius indagandarum, ab ipso aphoristice tantum propositarum, ita etiam hac de materia egregium & notatu dignum brevem licet reliquit locum in *Prænotionibus*; Ceterum, inquit, *erectum sedere velle malum est in acutis, pessimum autem in peripneumoniacis pulmone inflammato.* Quem locum ab auctoribus quibusdam, cum de signis morborum acutorum prognosticis funestis atque lethalibus agunt, allegatum quidem, nequaquam autem vel propriis observationibus confirmatum, vel solidis illustratum rationibus reperio. Ita videlicet Sennertus Institut. Lib. III. Part. III. C. V. inter signa prognostica ab actionibus læsis desumenda recenset quoque signa a decubitu ægrorum magis, vel minus naturali ac consueto depromi solita, eaque auctoritate Hippocratis confirmare studet, quo intuitu plura Hippocratis prognostica, & cum illis citatum quoque locum allegat, sed citra ullam illius explicationem.

§. II.

Ita etiam Celsus Lib. II. de Medicina Cap. IV. ubi de malis ægrotantium signis agit, *Gravis*, inquit, *morbi periculum est. ubi supinus æger jacet porrectis manibus & cruribus: ubi residere vult in ipso acuti morbi impetu, præcipueque pulmonibus laborantibus.* Ex hisce vero locis id tantummodo patet, citatos auctores Hippocratis auctoritatem ex parte secutos, ex parte etiam propria forsan experientia edoctos, situm ægrotantium erectum in morbis acutis equidem tanquam malum atque funestæ prognoseos signum agnovisse, quod pessimi eventus præsagium secum ferat; sed minus manifestum est, num situm erectum mali ejusmodi eventus pessimorumque symptomatum causam agnoverint. Id quod etiam suspicari licet de perspicacissimo ceteroquin Baglivo, qui ea, quæ a modo citatis auctoribus generatim ad morbos acutos applicata fuere, ad Pleuritidem solum restringit, Cap. de Pleuritide dicens: *Si cum mala respiratione æger erectus sedere velit in lecto, nec in lecto decumbere potest, quia sibi suffocari sentit: lethale id esse vidi in pluribus. Erectum igitur sedere velle in morbis acutis pulmonum perniciosum ac ferme lethale.*

§. III.

Cum igitur adducta loca Medicorum prognosin formandam præcipue respiciant, neque sufficiant ad veritatem historicam asserti hujus stabiliendam, dum situm erectum in morbis periculosis eorumque statu ac vigore valde perniciosum, pessimorumque symptomatum causam esse affirmo, atque hujus rei rationem investigare annitor, necessarium erit, ut ipsas inseram observationes ab Illustri DN. Decano mihi suppeditatas, easque tanquam selectiores fundamenti loco præmittat

mittam, ut postmodum rationes & causas repentinæ catastrophes sæpe numero occurrentis rite possim enodare. Prima autem observatio virum fuit 50. & quod excurrit annorum, superiore anno, quo febres petechiales multos in urbe infestabant, correptum eadem febre ex ipso contagio oborta. Placide & moderate succedebant omnia usque ad diem septimum; vires non adeo erant prostratæ, mens semper constabat, neque deficiebat penitus somnus, neque urina erat sine sedimento, pulsuum vero aderat debilitas cum celeritate quadam junctæ. Circa septimum diem ipsæ maculæ in corpore conspiciebantur, alvus per totum morbi decursum bis vel semel minimum singulis diebus aperiebatur: ad hanc itaque deponendam æger surrexit e lecto, & paulo diutius versatus est in sella perforata, bene tamen munitus tegumentis. Conquestus hinc fuit de animi defectione atque debilitate virium; hinc depositus fuit in lectum; extrema, manus nempe & pedes refrigescabant, & inhorrescebat quoque cutis. Ab hoc tempore pessime se habuit: maculæ enim vix conspiciebantur, & erant lividiores. Secuta est prostratio virium, de spirandi angustia conquerebatur & de pressione circa pectus; vix capiebat somnum, & deliræ ac male coherentiæ interdum sermoni intermiscerebat; pulsus etiam valde parvus & contractus deprehendebatur, & omnia erant mutata in pejus, nonoque die e vita decessit.

§. IV.

Altera historia idem confirmans juvenem concernit viginti & aliquot annorum, constitutionis obesioris & spongiosioris corporis, variolarum morbo laborantem, qui morbus cum gravi dolore dorsi & capitis,

ac quodam delirio secundo statim die superveniente invadebat. Circa diem quartum cessantibus omnibus his symptomatibus variolæ prodibant copiosissimæ, quæ nullo periculoso symptomate stipatæ erant usque ad nonum diem, nisi quod de summo incendio & dolore manuum fuerit conquestus, ubi ingens conspiciebatur pustularum suppuratio. Ob dolorem itaque & ardorem, atque anxietatem petiit ab adstantibus, ut vellent ipsum dimittere e lecto, ac prope lectum ad dimidium horæ sedebat in sella probe tectus, ut ne minimum aëris frigidi accessum parare potuerit. Postea vero simul & semel ob debilitatem & virium defectiorem petiit, ut in lectum rursus descenderet, a quo tempore facies, quæ antea erat valde turgida & rubicunda, & salia fortiter fluebat, cepit detumescere, salivæ fluxus etiam imminui. Nox subsequens plane erat insomnis, respirationis erat magna angustia atque difficultas, pulsus plane erat mutatus, debilis & inæqualis; sæpe simulabatur ad urinam edendam, sed parum secedebat; loquebatur male cohærentia, & ex improvise correptus convulsionibus periit.

§. V.

Tertius casus fere idem nos docebit occasione studiosi e generosa familia nati, annorum vix viginti. Hic absque gravioribus symptomatibus variolas experiebatur; siquidem statim tempore circa quartum nempe diem erumpebant pustulæ, quæ ad suppurationem placide quoque perveniebant. Noctes non erant plane insomnes; erat vero tenerioris constitutionis, & de debilitate & lassitudine conquerebatur per totum morbi decursum. Pulsus erat languidus cum a-

liquali frequentia junctus, alvus paulo magis adstricta: die octavo inflammationem quandam, sed leviores, in faucibus passus est. Medicus ad aperendam alvum, quæ jam per sex dies clausa erat, præscripsit Clysterem emollientem, salino stimulo, non adeo tamen forti, armatam, a quo infuso dejectiones habuit; sed cum tertia vice paulo diutius extra lectum versabatur in alvo dejicienda occupatus, tota ejus facies erat livida, & conquerebatur de animi & virium collabescencia subita, & vomendi quasi conatu (Daß ihm so übel sey) mox deducebatur in lectum, & pedes, qui paululum erant refrigerati, calidis integumentis operiti fuerunt; non ita multo post præter omnium opinionem graves accedebant convulsiones, quibus intra decem horas, postquam surrexit e lecto, periit.

§. VI.

Nec minus Excellentissimus Dn. Prof. Coschwitz privatis aliquando discursibus similes mecum communicavit casus, quibus situm erectum in agris purpura rubra laborantibus non minus funestumprehendit. Inter quos quam maxime notabilis erat ille, quem referebat de puerpera de cetero robusta & optimæ constitutionis, annorum 30. cui primiparæ lochia placide & sufficienter quidem fluebant, sed febris superveniebat continua, exacerbationes tempore vespertino & per noctem fervans, cum anxietate præcordiorum, sudore satis copioso, atque urinæ parciori excretionem. Succedebat post aliquot dies purpura rubra, quæ exhibitis licet diapnoicis privativis ac lenioribus, sed adhibito ab adstantibus præpostero regimine

ne nimis calido ac positive diaphoretico copiosissime efflorescebat, ita ut totum corpus instar crustæ obfideret, omnesque extremitates occuparet. Ægra de cetero notabilem virium defectum non patiebatur, nec delira erat, quamvis a somno expergiscens aliquando non adeo prompte sibi conscia esset. Medicus die a puerperio undecimo mane illam visitans, reperiēbat erecte sedentem in lecto, & quidem dorso iusto minus lectulis oblecto, nec tamen plane illis destituta. Sermonem faciebat ægra cum Medico, & distincte prægressæ noctis symptomata referebat, ac insuper maritum præ mœrore ægrotantem ipsius curæ commendabat. Purpura ubique locorum non modo erat conspicua, sed etiam in pectore ruberrima, ut nihil circa ejus efflorescentiam desiderari posset; pulsus erat frequens, plenus & satis æqualis; urina sedimentum monstrabat pallide roseum nec adeo paucum. Cum autem per dimidiam circiter horam in hoc situ perduraverit, præter omnium adstantium opinionem in momento delirare incipiebat, mox lipothymica evadebat; quapropter Medicum, qui vix ad ædes suas reversus erat, revocarunt; hic rediens mox adspiciebat purpuram, eamque per universum corpus rubram, nec ullo modo recedentem animadvertēbat, excepta regione præcordiali, in qua ad volæ manus majoris magnitudinem omnem ruborem amiserat & alba apparuerat, oculi caligine erant obducti, & intra horæ quadrantem ægra exspiravit. Id quod repetitis vicibus ab ipso observatum fuit in ægris purpura correptis, & quidem semper cum notabili illo phænomeno, ut, purpura in toto corpore manente rubra, portio

ejus in scrobiculo cordis & regione præcordiali albesceret, mortemque subitanem comitem haberet.

§. VII.

Primus vero omnium *Illustris Hoffmannus* est, qui hanc maximi momenti in praxi Medica observationem annotavit, ejusque mentionem facit in *Dissertatione* Anno 1699. habita, quæ *historiam febris malignæ epidemicæ petechialis Halæ grassantis* sistit, §. XI. hisce verbis: *Observatum sæpius a nobis fuit, non modo in hac grassante febre, sed etiam in aliis malignis, quod, si ægrotantes diutius in erecto corpus teneant situ, sive surgendo sive in lecto sedendo, morbi vehementia mirifice mox adaugeatur & increascit, ut etiam moris interdum brevi fuerit subsequuta. Sentiunt ægrotantes a tali situ ingentem mox debilitatem, animi deliquium, extremorum frigus, anxietates circa præcordia; quin imo maculæ, in cute quæ erant conspicuæ, mox sese abscondunt, cum maximo quod sequitur periculo.* Verum enim vero non tantum in morbis acutis & periculi plenis, sed & in Chronicis quibusdam exitium minantibus valde perniciosus observatur situs corporis erectus, atque capitis maxime diuturnior in linear ecta elevatio. Plura annotavit laudatus *Hoffmannus* hydrope consummata vel phtysi cum febre hectica ægrotantium & valde debilitatorum exempla, qui, cum paulo diutius extra lectum in sella capite erecto se detinuissent, non modo summam & extremam mox experti sunt debilitatem, animique defectionem, sed & interdum non ita multo post placide exspirarunt. Sed hæc sufficiant pro veritate hujus rei historica declaranda, cum ex adductis casibus & obser-

vati-

vationibus satis clare appareat, quam noxium & infestum sit in morbis acutis æque ac in longioribus ac dueturnis passionibus, præsertim ægrotantibus vi morbi valde debilitatis, in situ erecto corpus diutius tenere, adeo ut, quod valde mirandum, ipsa mors sæpius subsequatur. Ordo jam postulat, ut pro confirmanda phœnomeni hujus veritate etiam veras, genuinas atque solidas rationes & causas adducamus, ex quibus clare & evidenter appareat, erectum corporis situm tantam posse habere vim atque potentiam, ut tam funestos dictis in morbis & sub commemoratis circumstantiis corpori effectus possit inferre.

§. VIII.

Cum vero omnes veritates in rebus medicis theoreticæ secundum institutum & ductum Ill. Hoffmanni e sanguinis Circulo, qui universæ Medicinæ rationalis principium est ac fundamentum, deduci atque derivari debeant; videbimus num etiam inde hujus peculiaris & plane mirabilis phœnomeni causas veras & adæquatas deducere possimus. Primo itaque morborum acutorum natura explicanda erit, ut qualem mutationem in vigore suo sanguini, qui vitæ ac virium vera & materialis causa est, inferant, appareat; deinde quoque adjiciendum erit, qua ratione corporis & capitis situs erectus viribus debilitandis, imo Circulo sanguinis libero & æquabili turbando & destruendo, atque funestis symptomatibus arcessendis quadret atque accommodatus sit.

§. IX.

Per morbos acutos, in quibus minus convenit diutius erecte sedere vel in lecto surgere, intelligimus eos, quorum natura & essentia in motibus tam soli-

darum quam fluidarum partium inordinatis & valde auctis continetur; quorum in numero maxime sunt febres, & quidem eæ, quæ omni intermissione vacant, ubi continua per totum tempus morbi adest motuum acceleratio & vehementia tam eorum, qui in corde & arteriis, quam qui in ipso sanguine & humoribus fortiter motu progressivo & intestino agitatæ conspiciuntur. Quam infesta vero vitæ sit hæc motuum inordinatio & quantam vim habeat, omnes functiones, quæ secundum naturam fiunt, invertendi & destruendi, id non modo experientia fere quotidiana, sed & ratio satis exidenter declarat. Quid enim solennius est, & frequentius in praxi observatur, quam quod qui febribus acutis, sive maligni sive benigni moris sint, paulo diutius detinentur, præsertim si illæ ad *ακμην* vel vigorem devenerint, in summam prolabantur virium debilitatem, ut omnes corporis functiones valde labefactatæ appareant: Tum neque sensibus internis neque externis mens recte fruitur, quod male coherentes sermones ex phantasia corrupta indicant. Ad sunt præterea continuæ vigiliæ cum corporis inquietudine summaque anxietate junctæ, appetitus constans est prostratio, corpus valde emaciatum & consumtum videtur, omnis generis excretiones non recte se habent, urina mutata est, os plane aridum & exsiccum siti continua premitur, alvus constipata, vires penitus vacillant, pulsus arteriarum sunt minores, debiles ac inæquales, & accelerati. Horum graviorum Symptomatum in hisce febribus non alia reddi potest ratio, quam motuum qui in partibus solidis ac fluidis celebrantur nimis adaucta vehementia, qua humores, qui

qui vitam & vires tuentur, & functionibus secundum naturam præfunt, plane in crasi, mixtione & textura sua immutantur, corrumpuntur & destruuntur. Quandoquidem hæc sufficienter in physiologicis adstructa & demonstrata veritas hic quoque adduci & applicari meretur, quod nempe, si massa sanguinis & humorum debita, ratione quantitatis & temperaturæ, proportionem gaudeat, & æquabili, libero ac moderato partium solidarum, præsertim cordis & arteriarum pulsu, atque impulsu, per compagem corporis partium mere tubulosam & vasculosam circumferatur, tunc non modo vita & vires sibi consent, sed et omnes functiones rite sese habeant. Nam vires, vitæ & sanitatis natura motuum atque sanguinis & humorum temperie unice continentur & conservantur: Siquidem, quæ temperata sunt omnia, vitam & vires tueri, certa ex constanti observatione comperimus. Catholicum aeris nobilissimum fluidum, sine quo nullum subsistere potest animal, nec nimis frigidum, nec nimis calidum aut humidum, sed purum, serenum & temperatum, vitæ ac viribus maxime favet & patrocinator. Omnia, ex solidis & liquidis quæ assumuntur, quo magis ad blandam & amicam accedunt temperaturam, eo aptiora sunt magisque convenientia ad corporis nutritionem, ad sustentandas vires, omnesque animi & corporis functiones perficiendas; cum e contra omnia, quæ intemperata sunt, ut nimis spirituosæ, calidæ, acidæ, pinguiæ, acridæ, falsæ, viscidæ, tenaciæ, sanitatem & vires admodum lædant & ad morbos disponant. Insuper, quam benigna & amica naturæ Corporis animantium sit iusta & laudabilis sanguinis & humorum temperies, vel ex eo clare appa-

apparere arbitror, quod benignissima parens natura in ineffabili illa & sapientissima machinæ animantium structura tot organa secretoria & emunctoria & inter ea plurima & amplissimi usus viscera constituerit; quorum officii ratio vix ulla alia est, quam ut primo intimæ variarum tam solidarum, quam fluidarum, quæ sanguinem constituunt, partium mixtioni & fluiditati inserviant; deinde ut partes intemperatas ac superfluas, nominatim falsas, acres, sulphureas, viscidas, aqueas, separent ac secernant, easque tanquam plane inutiles & noxias e corpore ejiciant atque proscribant, ut intemerata ac temperata sanguinis & humorum massa permaneat.

§. X.

Jam vero explicanda erit ratio, cur sanguinis justa temperies & quantitas ad sustinendam vitam corporisque integritatem tantam energiam obtineat. Notum alias est, vitæ & sanitatis naturam libero & æquabili sanguinis & humorum progressu, & per vasorum systema circulatione contineri, eo quod hoc præsentente omnes & singulæ in corpore nostro quæ fiunt functiones recte & secundum ordinem sese habeant. At vero solidorum motus, qui fluida regunt & moderantur, non aliam originem atque causam agnoscunt, quam ipsa fluida, sanguinem nempe atque in eo contentam subtilissimam & nobilissimam, æereo-ætheream substantiam. Equidem illi, qui nec corporum nec motuum naturam ac vires intelligunt, aut spiritum à corpore discernere norunt, neque, quales potentia motrices & mechanicæ insint diversæ corporum structuræ, experimentis satis edocti sunt, nullum corporeum in

mo-

movendis solidis animantium partibus admittere volunt, sed potius ad plane ignota, & quæ nec definiri nec explicari possunt nomina, quæ pro veris motuum causis venditant, confugiunt, uti sunt innatum calidum, archæus, natura, sensus natura, vel naturæ sensu & ratione prædita, quæ percipiens eorum, quæ amica vel hostilia corpori sunt, pro horum æstimatione varie in conservationem corporis motus dirigat. Verum enim vero non negamus rem clarissimam, ad certas nempe perceptiones & cogitationes certos & determinatos quoque in quibusdam partibus enasci motus. Ecquis vero facultatis ratiocinandi gnarus inde concludere audebit, ergo perceptiones sunt causa efficiens horum motuum; ergo omnes motus, qui etiam præter voluntatem fiunt, a perceptionibus istis & operationibus animæ dependent: Et porro, ergo omnes isti motus a nulla alia causa, quam ab hac dicta proficiuntur. Cui enim nisi hospiti in physicis & medicis ignotum erit, operationes, quæ animæ tribuuntur, nempe perceptiones, inclinationes varias, ingenii quoque vigorem & vires, & sic dictos animi affectus a sanguinis & humorum temperie, ac circulo & motu libero maxima ex parte dependere. Deinde quotidiana constat experientia, ad aeris, ad alimentorum mutationem, & pro diversis rebus noxiis & alienis, imo venenatis, vel etiam salutaribus motus tam solidorum quam fluidorum pro lubitu accelerari, retardari, immutari, & actiones partium corporis labefactari vel etiam restaurari posse. Itaque non opus est, ut causas manifestas sensui & rationi obvias relinquendo adentia plane ignota, & quorum natura & actio in corpus

nostrum ne ullo quidem solido argumento, demonstrari potest, in allegandis motuum vitalium causis confugiamus. Nostra sententia hæc est: Cor partium moventium in corpore animantium princeps, tubuli arteriosi, & omnes canales, qui fluida vehunt, structura mechanico-geometrica gaudent, quæ in motum constrictionis & dilatationis, sive systoles & diastoles ab ipso sanguine invasis contento, & a fluido ejus tenuissimo, quod in cerebro secretum per nervos & nervosas membranas vehitur, animatur, & vigorem recipit. Etenim fluidorum ea est natura, ut eorum partes intestino semper gaudeant motu, adeo ut quo tenuiora sint, eo majori virtute & potentia movendi, resistendi & expandendi instructa sint, ut videmus in aëre, æthere & igne. Fluida itaque corporis nostri agunt in solidas partes, easque peculiari modo ad motum constructas movent, & solida motu agitata agunt rursus in fluida, eaque impellunt & propellunt, & hac actione mutua solidorum in fluida & fluidorum in solida circulus sanguinis & humorum vitalis absolvitur. Causa enim motuum, qui celebrantur in corpore humano, vitalium ipse sanguis est, mobilissima & subtilissima aëreo-æthereo elastica substantia refertus, quæ una cum subtilissima & purissima lymphæ in cerebri vasculoso cortice secreta per tubulos medullares & nervorum meatus ac poros in membranas non modo nerveas, sed & musculosas influit, inque iis sensationis ac motus systaltici omnisque toni ac roboris, quo partes instructæ sunt, causa & auctor existit. Neque enim ulla pars corporis nostri est, si sensu gaudet, si motu ac robore pollet, quæ non influxu sanguinis arteriosi & fluidi nervei opus habeat, atque

que adeo vasis sanguineis & nerveis membranis instructa sit; quorum tam necessarius est usus, ut ligato nervo vel arteria partis cujusdam, protinus ejus sensus, motus quoque & nutritio auferatur. Motus cordis, qui præcipua & princeps circulationis sanguinis ipsiusque vitæ causa est, itendidem non modo ab affluxu sanguinis copiosi, sed & ab influxu fluidi, quod nervi vehunt, dependet. Quare si vel fluidum subtilissimum in cerebro deficit, vel per animi affectus ejus motus turbatur & invertitur, aut nervi ad cor tendentes in animantibus præscinduntur; statim machina illa cordis impulsoria quiescit omnique motu destituitur, & corpus vita privatur.

§. XI.

Ad motum itaque cordis, arteriarum, omniumque partium activum & systalticum, quo sanguinis & humorum progressio & circuitus perficitur, necessario liquidi cujusdam ex cerebro & nervis provenientis, purissimi & mobilissimi sufficientem influxum desiderari, rem extra omnem dubitationem positam esse existimo: unde si vel liquidum hoc inquinatum vel impurum est, vel insufficiens, aut plane deficit, non mirum est & cordis motum cessare, & ab eo dependentem vitam quoque tolli. Hisce jam suppositis, ad clariorem observationum, quas supra adduximus, explicationem, jam paulo facilius & felicius pervenire licet. Propositum nempe est in ipsis observationibus practicis, in morbis periculosis & maxime acutis, uti sunt febres continuæ, præsertim exanthematicæ, inque earum statu, situm corporis ere-

ctum periculi plenissimum esse, adeo ut etiam inopinatam mortem accersere possit. Si itaque rationem hujus peculiaris eventus inquirere paulo accuratius velimus, primo omnium necesse est, ut quid febrium acutarum natura & quid erectus situs in earum vigore ad tantum vitæ periculum conferre possit investigemus.

§. XII.

Jam vero perquam notum esse omnibus, qui febrilis caloris indolem atque effectum penitus perspectum habent, arbitror: nihil magis benignam & blandam sanguinis humorumque vitalium temperiem ac mixtionem, destruere, invertere, & dulces ac insipidos fluores in falsos, sulphureos, nimis calidos, excrementitios humores convertere posse, ut plane inepti fiant ad omnes motus & functiones in corpore præstandas, quam nimium & præcalidum in febre particularum sanguinis motum intestinum. Accedit, quod sub nimio & præcalido æstu ciborum appetentia penitus prostrata sit, & nulli boni & laudabiles nutritioni & vitalibus motibus præstandis idonei succi in eorum locum, qui sub febrili ardore deperditi fuerunt, substitui possint. Denique neque illud prætermittendum est, acutas illas, easque exanthematicas atque malignas febres a materia sæpius valde virulenta, & quæ putridæ, fermentiscibilis indolis est, excitari, a qua longe facilius succorum vitalium naturalis & naturæ amica *χρῆσις* atque crasis destruitur. Jam vero inversa & destructa sanguinis boni, qui vitæ utique & motuum vitalium thesaurus & fundamentum est, in morbis acutis textura
non

non mirum est, vires motrices vacillare ac deficere, cordis & arteriarum motum languidiorem fieri, circumque sanguinis segniorem, & robur cordis omniumque partium deficere, quod maxime in statu, *ακμῇ* & vigore harum febrium conspicitur, sub quo etiam ob virium motricium defectum & propter stasim & stagnationem sanguinis in partibus principalioribus, cerebro, pulmonibus, ventriculo, & subsequenter inflammationem sphacelofam ordinarie agrotantes moriuntur: utpote in principio febris, ubi non tam diu æstus massam sanguinis deturbavit, non tanta virium defectio, quam in statu, in quo jam per septem dies & ultra vehementia febris continuavit, observatur. Videmus itaque in vigore febrium massam sanguinis, ex qua fluidum nerveum, & omne illud quod partes musculosas in motum excitat & animat, materiam & ortum suum trahit, plane corruptam, & depravatam esse, ut non mirum sit, vires, motus, & omnes actiones, quæ vitam sustinent, multum periclitari, motumque etiam cordis, a quo sanguis pellitur ad caput, valde imbecillum fieri.

§. XIII.

Ex hisce itaque, quæ a nobis jam dicta & adducta sunt, facile liquet, perpendicularem corporis situm in eo statu, ubi cordis motus valde exiguus & contractus est, admodum perniciosum & periculi plenum esse, eo quod semper & perpetuo sub tali corporis positura ascensus corporis gravis ad perpendiculum difficilis sit, multo vero magis, ubi vis impellens & movens cordis impar est sanguini ad caput & cerebrum protrudendo. Igitur exinde jam liquido

constat, si cerebrum sanguine destituitur, ex quo prodit fluidum illud, viribus motricibus ad solidas corporis humani partes regendas & movendas instructum; si porro etiam ipse sanguis in acutis iisque malignis febribus plane corruptus & depravatus est, cessare, penitus fluidi nervei, quod quasi, secundum Verulamium, rota suprema est, quæ omnes corporis nostri partes circum agit, secretionem, & inde animi defectionem atque syncopen fieri, vel minimum circulationem sanguinis longe debiliorem reddi; transpirationem quoque & excretionem inde imminui. Quam exitiosa vero in acutis febribus sit inertia motuum vitalium, & debilior sanguinis circuitus, vel plane ejus interceptio, exinde judicare licet, quia motus sanguinis ad cutem, quæ præcipuum corporis emunctorium est, & quo sordes in febribus excrementitiæ ejici & morbus solvi solet, inde turbatur, & valde imminuitur: unde videmus post situm corporis erectum paulo longiorem in febribus externum habitum corporis pallefcere, constringi, collabi, refrigerescere quoque, cutisque poros ac meatus occludi, quod cum ita contingat, non modo excretio noxiæ materiæ, quæ per cutis peripheriam fieri adhuc debebat, impeditur, & materia e corpore eliminanda intra illud detinetur, sed & quæ jam factæ erant invertuntur. Hinc enim fit, ut petechiales maculæ vel plane dispareant ac retrocedant, vel livescant & colorem cœruleum contrahant. In purpura quæ rubra erat, totus ille ambitus rubicundus simul & semel pallefcit, purpura ipsa albescit, aut sub constrictione cutis paulo fortiore repente evanescit; morbil-

li cito disparent cum totius ambitus externi corporis pallore ac refrigeratione, variolis idem evenit, dum pustularum ambitus alias rubicundus & floridus pallefcit aut livefcit, pustularum incrementum sufflamatur, earumque suppuratio impeditur, aut materia suppurata retropellitur, ut pustularum superficies vel concidat foveasque formet vel indurescat, corneamque duritiem repræsentet.

§. XIV.

Sordes itaque excrementitiæ e corpore ejiciendæ sed hoc modo retropulsæ humoribus iterum permiscuntur, atque non modo motum intestinum corruptorium ac dissolutorium illis inducendo mixtionis dissolutionem funestam minantur, sed etiam cum humoribus ad partes interiores nobilissimas præcipue nervosas delata, hic loci motus spasticos producit, qui promptissime in spasmos universaliores ac convulsiones degenerant, sub quibus ejusmodi ægrotantes ordinarie & ut plurimum moriuntur. Hæc itaque cum ita se habeant, luculenter satis inde patere arbitror, quare tam noxius deprehendatur situs corporis erectus, in morbis periculi plenis & præcipue in febribus exanthematicis; & quam necessarium consequenter sit medico practico, ut hanc quoque notatu dignissimam observationem in praxi probe attendat, damnaque, quæ ex hacce corporis positura in ejus modi ægrotantes redundare possunt, tempestivo consilio avertere studeat. Dissuadendus igitur omnino est situs corporis erectus, atque sedulo monendi ægrotantes, qui vel ejusmodi morbo acuto, prout sunt febres continuæ præsertim exanthematicæ, laborant, vel etiam

etiam quorum vires ex diuturniori quodam & chronico affectu, uti sunt pthisis & hectica, valde jam debilitatae & prostratae apparent, ne in horum affectuum statu & vigore lectum atque decubitum in eo deserant, ac vel in lecto vel in sella quadam erecti per aliquod tempus sedere, inque hoc situ diutius commorari cupiant: Careat sibi quoque Medicus, ne hoc tempore clysteribus, praesertim stimulo salino fortiori munitis, multo minus aliis purgantibus fortioribus, alvum nimis sollicitet, atque hinc crebrioribus dejectionibus aegro occasionem praebet, e lecto surgendi, ac in erecto situ diutius permanendi, multo potius, si alvus jam per se absque ulla stimulatione fluida existat, eam sub decubitu deponendam suadeat. Denique si forte aliquando ex improvviso in ejusmodi morborum statu aegrotum in situ erecto deprehendat, consultum erit, analeptics aut confortantibus eidem succurrere, viribusque valde labefactatis ac debilitatis aliquatenus reficiendis ac restaurandis operam dare, ut adeo ex omni parte dicta funesta Symptomata, quae diuturniorem in situ erecto commorationem consequi solent, quantum fieri potest, praecaveantur & avertantur, aegrorumque saluti & sanitati restituendae omni modo prospiciatur.